

後漢書

五



皇后紀第十上

范曄

後漢書十

唐章懷太子賢注

光武郭皇后

光烈陰皇后

明德馬皇后

章德竇皇后

和帝陰皇后

和熹鄧皇后

夏殷以上后妃之制其文略矣周禮王者

立后

鄭玄注禮記曰后之言後言在夫之後也

三夫人九嬪二十七

世婦八十一女御以備內職焉后正位宮

闈同體天王夫人坐論婦禮

鄭玄注周禮云夫人之於后猶

三公之於王坐而論婦禮也

九嬪掌教四德

九嬪比九卿周禮曰九嬪掌婦

學之法以教九御也四德謂婦德婦言婦容婦功也

世婦主喪祭賓客

服婦

也明其能服事於人也比二十七大夫周禮世婦掌祭祀賓客喪紀之事祭之日位陳女宮之具凡內羞

之物掌弔臨于卿大夫之喪

女御序于王之燕寢

御謂進御于王

也比八十一元士周禮曰女御叙于王之燕寢以歲時獻功事也

頒官分務各

有典司女史彤管記功書過

周禮云女史掌王后之禮書內

令凡后之事以禮從也鄭玄注云亦如大史之於王也彤管赤管筆也詩云詒我彤管注云古者后夫人

必有女史彤管之法也

居有保阿之訓動有環佩之響

列女傳曰齊孝公孟姬華氏之女從孝公遊車奔姬墮車碎孝公使駟馬立車載姬姬泣曰妾聞妃下堂

必從傳母保阿進退則鳴玉佩環今立車無輶非敢受命進賢才以輔佐君

子哀窈窕而不淫其色

詩序云關雎樂得淑女以配君子憂在進賢不

淫其色哀窈窕思賢才而無傷善之心毛萇注云窈窕幽閒也

所以能述宣陰

化修成內則

周禮內宰職曰以陰禮教六宮以婦職之法教九御

閨房

肅雍險謁不行也

肅敬也雍和也謁請也言能輔佐君子和順恭敬不行私

謁詩序曰雖則王姬猶執婦道以成肅雍之德又曰而無險詖私謁之心

故康王晚朝

關雎作諷

前書音義曰后夫人雞鳴佩玉去君所周康王后不然故詩人歎而傷之見魯

詩宣后晏起姜氏請愆

列女傳曰周宣姜后齊侯之女也宣王嘗夜卧

晏起后夫人不出房姜后既出乃脫簪珥待罪於永巷使傳母通言於王曰妾不才淫心見矣至使君王

失禮而晏起以見君王樂色忘德敢請罪惟君王之命王曰寡人之過夫人何辜遂勤政事成中興之名焉

及周室東遷禮序凋缺

幽王時西夷犬戎共攻殺幽王于驪

山之下太子宜臼立是爲平王東遷洛邑以避犬戎政遂微弱

諸侯僭縱軌制

無章齊桓有如夫人者六人

左傳曰桓公多內寵有如夫人者六

人長衛姬少衛姬鄭姬葛嬴密姬宋華子也

晉獻升戎女爲元妃

元妃

嫡夫人也史記曰晉獻公伐驪戎得驪姬愛幸立以爲妃

終於五子作亂

桓公

六夫人生六子桓公卒立公子昭於是公子無虧公子元公子潘公子商人公子雍等五公子皆求立公

子昭奔宋是作亂也

豕嗣遘屯

豕大也遘遇也屯難也晉獻公受驪姬之譖殺太子申生

故曰遇屯

爰逮戰國風憲逾薄適情任欲顛倒

衣裳

上曰衣下曰裳詩曰綠兮衣兮綠衣黃裳鄭玄曰祿衣黑今反以黃爲裏非其禮制諭妾

也

以至破國亡身不可勝數斯固輕禮弛

防先色後德者也秦并天下多自驕大宮

備七國

史記曰始皇破六國寫放其宮室作之咸陽北坂上南臨渭水殿屋複道周閣相屬

所得諸侯美人以充入之并秦爲七也

爵列八品

前書曰漢興因秦之稱號正嫡稱皇

后妾皆稱夫人又有美人良人八子七子長使少使之號

漢興因循其號而

婦制莫釐

釐理

高祖帷薄不修

大戴禮曰大臣坐污穢男

女無別者不曰污穢曰帷薄不修謂周昌入奏事高帝擁戚姬是不修也

孝文衽席

無辯

鄭玄注禮記曰衽卧席也孝文幸慎夫人每與皇后同坐是無辯也

然而選

納尚簡飾翫少華自武元之後世增淫費

至乃掖庭三千增級十四

婕妤一姬娥二容華三充衣四已上武帝

置昭儀五元帝置美人六良人七七子八八子九長使十少使十一五官十二順常十三無涓共和娛靈

保林良使夜者十四此六官品秩同爲一等也妖倖毀政之符外姻亂

邦之迹前史載之詳矣及光武中興斲彫

爲朴

彫謂刻鏤也史記曰漢興破觚而爲圓斲珣而爲璞

六宮稱號唯

皇后貴人

鄭玄注周禮曰皇后正寢一燕寢五是爲六宮也夫人已下分居焉

貴

人金印紫綬奉不過粟數十斛又置美人

宮人采女三等並無爵秩歲時賞賜充給

而已漢法常因八月筭人

漢儀注曰八月初爲筭賦故曰筭人

遣中大夫與掖庭丞及相工於洛陽鄉中
閱視良家童女年十三以上二十已下姿
色端麗合法相者載還後宮擇視可否乃
用登御所以明慎聘納詳求淑哲明帝聿
遵先旨宮教頗修登建嬪后必先令德內
無出閫之言

閫門限也禮記曰外言不出於閫也

權無私

溺之授可謂矯其敝矣向使因設外戚之

禁編著甲令

前書音義曰甲令者前帝第
一令也有甲令乙令丙令

改正

後漢紀十一
后妃之制貽厥方來豈不休哉雖御已有

度而防閒未篤故孝章以下漸用色授恩

隆好合遂忘淄蠹

淄黑也蠹食木蟲以諭傾敗也

自古雖主

幼時艱王家多釁必委成冢宰簡求忠賢

未有專任婦人斷割重器唯秦苧太后始

攝政事

苧音亡爾反

故穰侯權重於昭王家富

於嬴國

太后昭王母也號宣太后史記曰昭王立年少宣太后自知事以同母弟魏冉爲將

軍任政封爲穰侯太后攝政始於此也

漢仍其謬知患莫改東京

皇統屢絕權歸女主外立者四帝

謂安質桓靈

臨

朝者六后

章帝竇太后和熹鄧太后安思閭太后順烈梁太后桓思竇太后靈思何太后

也莫不定策帷帟委事父兄貪孩童以久

其政抑明賢以專其威

周禮幕人掌幃帟幕之事鄭玄注曰帟

幄中坐上承塵也殤帝崩鄧太后與兄騭等迎立安帝年十三冲帝崩梁太后與兄翼迎立質帝年八歲質帝崩太后與兄翼迎立桓帝年十五桓帝崩竇太后與父武迎立靈帝年十二任重道

悠利深禍速身犯霧露於雲臺之上

謂疾

病也不可指言死故假霧露以言之靈帝時中常侍曹節矯詔遷太后於雲臺謝弼上封事曰伏惟皇太后援立明聖幽居空宮如有霧露之疾陛下當何面目以見天下家嬰縲絏於

囹圄之下

縲索也絏繫也囹圄周獄名也鄉亭之獄曰犴音五且反謂外戚等被誅也

湮滅連踵傾軛繼路

踵跡也軛車轅也賈誼曰前車覆後車誡

而

赴蹈不息焦爛爲期終於陵夷大運淪亡

神寶

陵夷猶頽替神寶帝位也

詩書所歎略同一揆故

考列行跡以爲皇后本紀雖成敗事異而

同居正號者並列于篇其以私恩追尊非

當時所奉者則隨它事附出

謂安帝母左姬及祖母宋貴人

之類並見清河孝王傳

親屬別事各依列傳其餘無所

見則係之此紀

謂賈貴人虞美人之類是

以續西京外

戚云爾

續繼也

光武郭皇后諱聖通真定豪人也

豪縣名故城在

本恒州豪城縣西

爲郡著姓父昌讓田宅財產數百

萬與異母弟國人義之仕郡功曹娶真定

恭王女號郭主

恭王名普景帝七代孫

生后及子況

昌早卒郭主雖王家女而好禮節儉有母儀之德更始二年春光武擊王郎至真定

因納后有寵及即位以爲貴人建武元年生皇子彊帝善況小心謹慎年始十六拜黃門侍郎二年貴人立爲皇后彊爲皇大

子封況縣蠻侯以后弟貴重賓客輻湊況
恭謙下士頗得聲譽十四年遷城門校尉
其後后以寵稍衰數懷怨懟十七年遂廢
爲中山王太后進后中子右翊公輔爲中
山王以常山郡益中山國徙封況大國爲
陽安侯

陽安縣屬汝南郡故城在今
豫州卽山縣故道國城是也

后從兄竟

以騎都尉從征伐有功封爲新鄭侯官至

東海相

新鄭縣屬汝南郡故城在今潁州汝
陰縣西北鄭丘城是也音七私反

竟弟

匡爲發干侯

發干縣屬東郡故城在
今博州堂邑縣西南

官至大

中大夫后叔父梁早終無子其壻南陽陳

茂以恩澤封南縣侯

縣音力全反

二十年中山王

輔復徙封沛王后爲沛太后況遷大鴻臚

帝數幸其第會公卿諸侯親家飲燕賞賜

金錢縑帛豐盛莫比京師號況家爲金穴

二十六年后母郭主薨帝親臨喪送葬百

官大會遣使者迎昌喪柩與主合葬追贈

昌陽安侯印綬謚曰思侯二十八年后薨

葬于北芒帝憐郭氏詔況子璜尚清陽公

主除璜爲郎顯宗即位況與帝舅陰識陰
就並爲特進數授賞賜恩寵俱渥禮待陰
郭每事必均永平二年況卒贈賜甚厚帝
親自臨喪謚曰節侯子璜嗣元和三年肅
宗北巡狩過眞定會諸郭朝見上壽引入

倡飲甚歡

說文曰倡樂也聲類曰俳

以大牢具上郭主冢

賜粟萬斛錢五十萬永元初璜爲長樂少

府

長樂少府掌皇太后宮秩二千石居長信宮曰長信少府長樂宮曰長樂少府

子舉

爲侍中兼射聲校尉及大將軍竇憲被誅

舉以憲女壻謀逆故父子俱下獄死家屬

徙合浦

郡名今廉州縣

宗族爲郎吏者悉免官新

鄴侯音初爲騎將

前書曰車戶騎將屬光祿秩比千石

從征伐

有功拜東海相永平中卒子嵩嗣嵩卒追

坐染楚王英事國廢建初二年章帝紹封

嵩子勤爲伊亭侯勤無子國除發干侯匡

官至大中大夫建武三十年卒子勲嗣勲

卒子駿嗣永平十三年亦坐楚王英事失

國建初三年復封駿爲觀都侯卒無子國

除郭氏侯者凡三人皆絕國

論曰物之興衰情之起伏理有固然矣而

崇替去來之甚者必唯寵惑乎當其接牀

第承恩色雖險情贅行莫不德焉

說文曰贅肱也

老子曰餘食贅行河上公注曰行之無當爲贅莊子曰附贅懸肱言醜惡也

及至移意

愛析嬖私雖惠心妍狀愈獻醜焉愛升則

天下不足容其高歡隊故九服無所逃其

命斯誠志士之所沉溺君人之所抑揚未

或違之者也郭后以衰離見貶恚怨成尤

而猶恩加別館增寵黨戚至乎東海遂巡
去就以禮使後世不見隆薄進退之隙不
亦光於古乎

光烈陰皇后諱麗華

謚法曰執德遵業曰烈東觀記有陰子公者生子方

方生幼公公生君孟名睦即
后之父也今世本睦作陸

南陽新野人初光

武適新野聞后美心悅之後至長安見執

金吾車騎甚盛因歎曰仕宦當作執金吾

娶妻當得陰麗華更始元年六月遂納后

於宛當成里時年十九及光武爲司隸校

尉方西之洛陽令后歸新野及鄧奉起兵
后兄識爲之將后隨家屬徙涇陽止於奉
舍光武即位令侍中傅俊迎后與胡陽寧
平主諸宮人俱到洛陽以后爲貴人

寧平縣屬淮陽

故城在今亳州谷陽縣西南

帝以后雅性寬仁欲崇以尊

位后固辭以郭氏有子終不肯當故遂立
郭皇后建武四年從征彭寵生顯宗於元
氏九年有盜劫殺后母鄧氏及弟訢音欣帝
甚傷之乃詔大司空曰吾微賤之時娶於

陰氏因將兵征伐遂各別離幸得安全俱

脫虎口

莊子曰孔子見盜跖謂柳下惠曰幾不免於虎口

以貴人有母

儀之美宜立爲后而固辭弗敢當列於媵

妾

爾雅曰媵送也孫炎曰送女曰媵

朕嘉其義讓許封諸弟

未及爵土而遭患逢禍母子同命愍傷于

懷小雅曰將恐將懼惟予與汝將安將樂

汝轉弃予

谷風之詩

風人之戒可不慎乎其追

爵謚貴人父陸爲宣恩哀侯弟訢爲宣義

恭侯以弟就嗣哀侯後及尸柩在堂使大

中大夫拜授印綬如在國列侯禮魂而有
靈嘉其寵榮十七年廢皇后郭氏而立貴
人制詔三公曰皇后懷執怨懟數違教令
不能撫循它子訓長異室宮闈之內若見

鷹鷂

爾雅曰宮中
小門謂之闈

既無關雎之德而有呂

霍之風豈可託以幼孤恭承明祀今遣大

司徒涉

戴涉也

宗正吉持節其上皇后璽綬

陰貴人鄉里良家歸自微賤

公羊傳曰婦
人謂嫁曰歸

自

我不見于今三年

詩豳風東
山之詞也

宜奉宗廟爲

天下母主者詳案舊典時上尊號異常之事非國休福不得上壽稱慶后在位恭儉少嗜玩不喜笑謔性仁孝多矜慈七歲失父雖已數十年言及未曾不流涕帝見常歎息顯宗即位尊后爲皇太后永平三年冬帝從太后幸章陵置酒舊宅會陰鄧故人諸家子孫並受賞賜七年崩在位二十四年年六十合葬原陵明帝性孝愛追慕無已十七年正月當謁原陵夜夢先帝大

后如平生歡既寤悲不能寐即案歷明日吉遂率百官及故客上陵其日降甘露於陵樹帝令百官采取以薦會畢帝從席前伏御牀視太后鏡奩中物奩音鑑匣也音廉感動悲涕令易脂澤裝具左右皆泣莫能仰視焉

明德馬皇后諱某

謚法曰忠和純淑曰德諱某者史失其名下皆類此伏

波將軍援之小女也少喪父母兄客卿敏惠早夭母蘭夫人悲傷發疾恍惚后時年

十歲幹理家事勅制僮御

幹正也廣雅曰僮御皆使者也內

外諮稟事同成人初諸家莫知者後聞之
咸歎異焉后嘗久疾大夫人令筮之筮者
曰此女雖有患狀而當大貴兆不可言也
後又呼相者使占諸女見后大驚曰我必
爲此女稱臣然貴而少子若養它子者得
力乃當踰於所生初援征五溪蠻卒於師
虎賁中郎將梁松黃門侍郎竇固等因譖
之由是家益失勢又數爲權貴所侵侮后
從兄嚴不勝憂憤白大夫人絕竇氏婚求

進女掖庭乃上書曰臣叔父援孤恩不報

孤負也

而妻子特獲恩全戴仰陛下爲天爲

父人情既得不死便欲求福竊聞天子諸

王妃匹未備援有三女大者十五次者十

四小者十三儀狀髮膚上中以上

東觀記曰明帝馬皇

后美髮爲四起大髻但以髮成尚有餘髮髻三匝眉不施黛獨左眉角小缺補之如粟常稱疾而終身得

意皆孝順小心婉靜有禮

婉順

願下相工簡

其可否如有萬一援不朽於黃泉矣又援

姑姊妹並爲成帝婕妤葬於延陵臣嚴幸

得蒙恩更生冀因緣先姑當充後宮由是
選后入大子宫時年十三奉承陰后傍接
同列禮則脩備上下安之遂見寵異常居
後堂顯宗即位以后爲貴人時后前母姊
女賈氏亦以選入生肅宗帝以后無子命
令養之謂曰人未必當自生子但患愛養
不至耳后於是盡心撫育勞悴過於所生
肅宗亦孝性淳篤恩性天至母子慈愛始
終無纖介之間

纖介猶細微也閒隙也

后常以皇嗣

未廣每懷憂歎薦達左右若恐不及後宮

有進見者每加慰納若數所寵引輒增隆

遇永平三年春有司奏立長秋宮

皇后所居宮也長者

父也秋者萬物成熟之初也故以名焉請立皇后不敢指言故以宮稱之

帝未有所言

皇太后曰馬貴人德冠後宮即其人也遂

立爲皇后先是數日夢有小飛蟲無數赴

著身又入皮膚中而復飛出既正位宮闈

愈自謙肅身

長七尺二寸方口美髮能誦

易好讀春秋楚辭尤善周官董仲舒書

周官

周禮也仲舒書玉杯蕃露
清明竹林之屬也蕃音繁

常衣大練裙不加緣

大練大帛也杜預注左傳曰大帛厚縉也
大后兄廖上書曰今陛下躬服厚縉是也

朔望諸

姬主朝請

漢律春曰朝秋曰請

望見后袍衣踈麤反以

爲綺縠就視乃笑后辭曰此縉特宜染色

故用之耳六宮莫不歎息帝嘗幸苑囿離

宮后輒以風邪露霧爲戒辭意款備多見

詳擇帝幸濯龍中

續漢志曰濯龍園名也近北宮

並召諸才

人下邳王已下皆在側請呼皇后帝笑曰

是家志不好樂雖來無歡是以遊娛之事

希嘗從焉十五年帝案地圖將封皇子悉
半諸國后見而言曰諸子裁食數縣於制
不已儉乎帝曰我子豈宜與先帝子等乎
歲給二十萬足矣時楚獄連年不斷囚相
證引坐繫者甚衆后慮其多濫乘間言及

惻然帝感悟之夜起彷徨爲思所納

思后所納之言

卒多有所降宥時諸將奏事及公卿較議

難平者

廣雅曰較明也

帝數以試后后輒分解趣

理各得其情每於侍執之際輒言及政事

多所毗補而未嘗以家私干欲寵敬日隆
始終無衰及帝崩肅宗即位尊后曰皇大
后諸貴人當徙居南宮大后感析別之懷
各賜王赤綬加安車駟馬白越三千端

白越

越布

雜帛二千匹黃金十斤自撰顯宗起居

注削去兄防參醫藥事帝請曰黃門舅旦

夕供養且一年既無褒異又不錄勤勞無

乃過乎太后曰吾不欲令後世聞先帝數

親後宮之家故不著也建初元年欲封爵

諸舅太后不聽明年夏大旱言事者以爲

不封外戚之故有司因此上奏宜依舊典

漢制外戚以恩澤封侯故曰舊典也太后詔曰凡言事者皆欲

媚朕以要福耳昔王氏五侯同日俱封帝成

封太后弟王譚王商王立王根王逢時等同時爲關內侯其時黃霧四塞不

聞澍雨之應又田蚡竇嬰寵貴橫恣傾覆

之禍爲世所傳田蚡景帝王皇后同母弟武安侯也爲丞相貪驕與淮南王霸上私

語後薨武帝曰使武安侯在者族矣竇嬰文帝竇皇后從兄子魏其侯也爲丞相坐與灌夫朋黨奔市也

故先帝防慎舅氏不令在樞機之位樞機近要之官

也春秋運斗樞曰北斗第一天樞第二璇第三機也諸子之封裁令半楚

淮陽諸國常謂我子不當與先帝子等今有司柰何欲以馬氏比陰氏乎吾爲天下母而身服大練食不求甘左右但著帛布無香薰之飾者欲身率下也以爲外親見之當傷心自勅但笑言太后素好儉前過濯龍門上見外家問起居者車如流水馬如游龍倉頭衣綠襦領袖正白

襦臂衣今之臂襦以縛左右手

於事便也

顧視御者不及遠矣故不加譴怒但

絕歲用而已冀以默愧其心而猶懈怠無
憂國忘家之慮知臣莫若君況親屬乎吾
豈可上負先帝之旨下虧先人之德重襲

西京敗亡之禍哉固不許

西京外戚呂祿呂產
竇嬰上官桀安父子

霍禹等
皆被誅

帝省詔悲歎復重請曰漢興舅氏

之封侯猶皇子之爲王也太后誠存謙虛

柰何今臣獨不加恩三舅乎且衛尉年尊

兩校尉有大病

衛尉太后兄廖兩
校尉兄防兄光也

如今不諱

使臣長抱刻骨之恨宜及吉時不可稽留

太后報曰吾反覆念之思令兩善豈徒欲

獲謙讓之名而使帝受不外施之嫌哉以恩

澤封爵外家爲外施也昔竇太后欲封王皇后之兄實太

后文帝后也王皇后景帝后也兄即王信後封爲蓋侯丞相條侯言受高

祖約無軍功非劉氏不侯條侯周亞夫也前書曰高帝與功臣

約非劉氏不王非有功不侯不如約天下共擊之今馬氏無功於國豈

得與陰郭中興之后等邪常觀富貴之家

祿位重疊猶再實之木其根必傷太子曰再實之木根

必傷掘臧之家後必殃也且人所以願封侯者欲上奉祭

祀下求溫飽耳今祭祀則受四方之珍衣

食則蒙御府餘資斯豈不足而必當得一

縣乎吾計之孰矣勿有疑也夫至孝之行

安親爲上今數遭變異穀價數倍憂惶晝

夜不安坐卧而欲先營外封違慈母之拳

拳乎

拳拳猶勤勤也音權

吾素剛急有匈中氣不可

不順也若陰陽調和邊境清靜然後行子

之志吾但當含飴弄孫

方言曰飴飴也陳楚宋衛之間通語

不能

復關政矣時新平主家御者失火延及北

閣後殿太后以爲己過起居不歡時當謁
原陵自引守備不慎慙見陵園遂不行初
大夫人葬起墳微高太后以爲言兄廖等
即時減削其外親有謙素義行者輒假借
溫言賞以財位如有纖介則先見嚴格之
色然後加譴其美車服不軌法度者便絕
屬籍遣歸田里廣平鉅鹿樂成王車騎朴
素無金銀之飾帝以白太后太后即賜錢
各五百萬於是內外從化被服如一諸家

惶恐倍於永平時乃置織室蠶於濯龍中

前書有東織西織屬少府平帝改名織室數往觀視以爲娛樂常

與帝旦夕言道政事及教授諸小王論議

經書述叙平生雍和終日四年天下豐稔

方垂無事帝遂封三舅廖防光爲列侯並

辭讓願就關內侯太后聞之曰聖人設教

各有其方知人情性莫能齊也禮記王制曰凡居人材必

因天地寒煖燥濕廣谷大川異制人居其間異俗修其教不易其俗齊其政不易其宜中國戎夷五方之

人皆有性也吾少壯時但慕竹帛志不顧命不可推移

言少慕古人書名竹帛不顧命之長短

今雖已老而復戒之在得

論語孔子曰少之時戒之在色及其老也戒之在得得貪嗇也言彌復吝惜封爵不欲濫封親戚也故

日夜惕厲思自降損

惕懼也厲危也

居不求安食

不念飽冀乘此道不負先帝所以化導兄弟共同斯志欲令瞑目之日無所復恨何意老志復不從哉萬年之日長恨矣廖等不得已受封爵而退位歸第焉太后其年寢疾不信巫祝小醫數勅絕禱祀至六月崩在位二十三年年四十餘合葬顯節陵

賈貴人南陽人建武末選入太子宫中元
二年生肅宗而顯宗以爲貴人帝旣爲大
后所養專以馬氏爲外家故貴人不登極
位賈氏親族無受寵榮者及太后崩乃策
書加貴人王赤綬

續漢書曰諸侯王赤綬也

安車一駟永

巷宮人二百

永巷宮中署名也後改爲掖庭永巷宮人即官婢也

御府雜

帛二萬匹大司農黃金千斤錢二千萬諸

史並闕後事故不知所終

章德竇皇后諱某扶風平陵人大司徒駘

之曾孫也祖穆父勲坐事死事在竇融傳

勲尚東海恭王彊女泚陽公主后其長女

也家既廢壞數呼相工問息耗

薛氏韓詩章句曰耗惡也

息耗猶言善惡也見后者皆言當大尊貴非臣妾容

貌年六歲能書親家皆竒之建初二年后

與女弟俱以選例入見長樂宮進止有序

風容甚盛肅宗先聞后有才色數以訊諸

姬傳

訊問也傳謂傳母

及見雅以爲美馬太后亦異

焉因入掖庭見於北宮章德殿后性敏給

傾心承接稱譽日聞明年遂立爲皇后妹
爲貴人七年追爵謚后父勲爲安成思侯

安成縣屬汝南郡故城
在今豫州吳房縣東南

后寵幸殊特專固後宮

初宋貴人生皇太子慶梁貴人生和帝后
既無子並疾忌之數間於帝漸致踈嫌因
誣宋貴人挾邪媚道遂自殺廢慶爲清河
王語在慶傳梁貴人者褻親愍侯梁竦之
女也少失母爲伯母舞陰長公主所養

長公

主光武女
梁松尚焉

年十六亦以建初二年與中姊俱

選入掖庭爲貴人四年生和帝后養爲已

子欲專名外家而忌梁氏八年乃作飛書

以陷竦

飛書若今
匿名書也

竦坐誅貴人姊妹以憂卒

自是宮房慄息

慄懼也音牒周書曰臨
捕以威而氣慄懼也

后愛日

隆及帝崩和帝即位尊后爲皇太后皇大

后臨朝尊母沘陽公主爲長公主益湯沐

邑三千戶兄憲弟篤景並顯貴擅威權後

遂密謀不軌永元四年發覺被誅九年大

后崩未及葬而梁貴人姊嬃

音一
計反

上書陳

貴人枉歿之狀大尉張酺司徒劉方司空

張奮上奏依光武黜呂太后故事

中元元年黜呂后不

宜配食

高廟

貶太后尊號不宜合葬先帝百官亦

多上言者帝手詔曰竇氏雖不遵法度而

太后常自減損朕奉事十年深惟大義禮

臣子無貶尊上之文恩不忍離義不忍虧

案前世上官太后亦無降黜

上官太后昭帝后也父安與燕王謀

反誅太后以年少又霍光外孫故不廢也

其勿復議於是合葬敬陵

在位十八年帝以貴人酷歿斂葬禮闕乃

改殯於承光宮上尊謚曰恭懷皇后

謚法曰
勛事尊

上曰恭慈仁
哲行曰懷

追服喪制百官縞素與姊大貴

人俱葬西陵儀比敬園

敬園安帝祖母
宋貴人之園也

和帝陰皇后諱某光烈皇后兄執金吾識

之曾孫也后少聰慧善書藝永元四年選

入掖庭以先后近屬故得爲貴人有殊寵

八年遂立爲皇后自和熹鄧后入宮

熹音許
其反

愛寵稍衰數有恚恨后外祖母鄧朱出入

宮掖十四年夏有言后與朱共挾巫蠱道

巫師爲蠱故曰巫蠱
左傳注曰蠱惑也

事發覺帝遂使中常侍張

慎與尚書陳褒於掖庭獄雜考案之朱及
二子奉毅與后弟軼輔敞辭語相連及以

爲祠祭祝詛大逆無道奉毅輔考死獄中

帝使司徒魯恭持節賜后策上璽綬遷于

桐宮以憂死立七年葬臨平亭部

葬於亭部內之地也

父特進綱自殺軼敞及朱家屬徙日南比

景縣宗親外內昆弟皆免官還田里永初

四年鄧太后詔赦陰氏諸徙者悉歸故郡

還其資財五百餘萬

和熹鄧皇后諱綏

蔡邕曰諡法有功安人曰熹

太傅禹之

孫也父訓護羌校尉母陰氏光烈皇后從

弟女也后年五歲大傅夫人愛之自爲翦

髮夫人年高目冥誤傷后額忍痛不言左

右見者怪而問之后曰非不痛也大夫人

哀憐爲斷髮難傷老人意故忍之耳六歲

能史書

史書周宣王大史籀所作大篆十五篇也前書曰教學童之書也

十二

通詩論語諸兄每讀經傳輒下意難問

下意

猶出
意也

志在典籍不問居家之事母常非之

曰汝不習女工以供衣服乃更務學寧當

舉博士邪后重違母言晝修婦業暮誦經

典家人號曰諸生父訓異之事無大小輒

與詳議永元四年當以選入會訓卒后晝

夜號泣終三年不食鹽菜憔悴毀容親人

不識之后嘗夢捫天

捫摸也

蕩蕩正青若有

鍾乳狀乃仰嗽飲之以訊諸占夢言堯夢

攀天而上湯夢及天而喏之

喏音是

斯皆聖

王之前占吉不可言又相者見后驚曰此

成湯之法也

續漢書曰相者待詔相工蘇大曰此成湯之骨法

家人竊

喜而不敢宣后叔父陔言常聞活千人者
子孫有封兄訓爲謁者使修石曰河歲活
數千人天道可信家必蒙福初大傅禹歎
曰吾將百萬之衆未嘗妄殺一人其後世
必有興者七年后復與諸家子俱選入宮
后長七尺二寸姿顏姝麗

姝美色也詩曰彼姝者子

絕異

於衆左右皆驚八年冬入掖庭爲貴人時

年十六恭肅小心動有法度承事陰后夙

夜戰兢接撫同列常克已以下之雖宮人

隸役皆加恩借帝深嘉愛焉及后有疾特

令后母兄弟入視醫藥不限以日數后言

於帝曰宮禁至重而使外舍久在內省

外舍

家上令陛下有幸私之譏下使賤妾獲不

知足之謗上下交損誠不願也帝曰人皆

以數入爲榮貴人反以爲憂深自抑損誠

難及也每有讌會諸姬貴人競自修整簪

珥光采桂裳鮮明

說文曰簪笄也珥瑱也以玉充耳釋名曰婦人上服曰珥

而后獨著素裝服無飾其衣有與陰后同色者即時解易若並時進見則不敢正坐離立行則僂身自卑

離並也禮記曰離坐離立無往參焉

帝每有

所問常逡巡後對不敢先陰后言帝知后

勞心曲體歎曰修德之勞乃如是乎後陰

后漸踈每當御見輒辭以疾時帝數失皇

子后憂繼嗣不廣恒垂涕歎息數選進才

人以博帝意陰后見后德稱日盛不知所

爲遂造祝詛欲以爲害帝嘗寢病危甚陰
后密言我得意不令鄧氏復有遺類后聞
乃對左右流涕言曰我竭誠盡心以事皇
后竟不爲所祐而當獲罪於天婦人雖無
從死之義然周公身請武王之命

武王有疾周公爲之

請命於大王王季文王曰若爾三王有不子之責于天以旦代某之身也

越姬心誓言

必死之分

越姬楚昭王之姬越王句踐女也昭王燕遊越姬從謂姬曰樂乎對曰樂則樂

矣而不可久也王曰願與子生死若此姬曰君王樂遊要妾以死不敢聞命後王病有赤雲夾曰如飛鳥
王問周大史史曰是害王身請移於將相王曰將相
於孤猶股肱也不聽姬曰大哉君王之德妾請從王

死矣昔日遊樂是以不敢聽命今君王復禮國人爲君王死何況妾乎妾願先驅狐狸於地下昔日口雖不言心許之矣妾聞信者不負其心遂自殺故曰心誓事見列女傳也

上以報帝之

恩中以解宗族之禍下不令陰氏有人豕

之譏

高帝愛幸戚夫人帝崩呂太后斷夫人手即足去眼薰耳使居鞠室中名曰人彘也

即

欲飲藥宮人趙王者固禁之因詐言屬有使來上疾已愈后信以爲然乃止明日帝果瘳十四年夏陰后以巫蠱事廢后請救不能得帝便屬意焉后愈稱疾篤深自閉絕會有司奏建長秋宮帝曰皇后之尊與

朕同體承宗廟母天下豈易哉唯鄧貴人
德冠後庭乃可當之至冬立爲皇后辭讓
者三然後即位手書表謝深陳德薄不足
以充小君之選是時方國貢獻競求珍麗
之物自后即位悉令禁絕歲時但供紙墨
而已帝每欲官爵鄧氏后輒哀請謙讓故
兄隲終帝世不過虎賁中郎將元興元年
帝崩長子平原王有疾而諸皇子夭没前
後十數後生者輒隱秘養於人間殤帝生

始百日后乃迎立之尊后爲皇太后太后
臨朝和帝葬後宮人並歸園太后賜周馥
貴人策曰朕與貴人託配後庭共歡等列
十有餘年不獲福祐先帝早弃天下孤心
煢煢煢煢孤特之貌也詩曰煢煢在疚靡所瞻仰夙夜永懷

感愴發中今當以舊典分歸外園慘結增

歎燕燕之詩曷能喻焉

詩邶鄘序曰衛莊姜送歸妾也其詩曰燕

燕于飛差池其羽之子于歸遠送于野瞻望不及泣涕如雨

其賜貴人王青蓋

車采飾輅驂馬各一駟黃金三十斤雜帛

三千匹白越四千端又賜馮貴人王赤綬

以未有頭上步搖環珮加賜各一具

周禮王后首服

爲副所以副首爲飾若今步搖也釋名曰皇后首副其上有垂珠步則搖也

是時新遭

大憂法禁未設宮中亡大珠一篋太后念

欲考問必有不辜乃親閱宮人觀察顏色

即時首服又和帝幸人吉成御者共枉吉

成以巫蠱事遂下掖庭考訊辭證明白大

后以先帝左右待之有恩平日尚無惡言

今反若此不合人情更自呼見實覈果御

者所爲莫不歎服以爲聖明常以鬼神難
徵淫祀無福乃詔有司罷諸祠官不合典
禮者又詔赦除建武以來諸犯妖惡及馬
竇家屬所被禁錮者皆復之爲平人減大
官導官尚方內者服御珍膳靡麗難成之
物漢官儀曰大官主膳羞也前書音義曰導官主導
擇米以供祭祀尚方掌工作刀劍諸物及刻玉爲
器漢官儀曰內者主帷帳並署名也自非供陵廟稻粱米不得導
擇朝夕一肉飯而已舊大官湯官經用歲
且二萬萬經常也太后勅止曰殺省珍費自

是我數千萬及郡國所貢皆減其過半悉

斥賣上林鷹犬其蜀漢釵器九帶佩刀並

不復調

蜀蜀郡也漢廣漢郡也二郡主作供進之器元帝時貢禹上書蜀廣漢主金銀器各

用五百萬是也釵音口以金銀緣器也

止畫工三十九種又御府

尚方織室錦繡冰紈綺縠金銀珠玉犀象

瑇瑁彫鏤翫弄之物皆絕不作離宮別館

儲峙米糒薪炭悉令省之

儲峙猶蓄積也糒乾飯

又詔

諸園貴人其官人有宗室同族若羸老不

任使者令園監實覈上名自御北宮增喜

觀閱問之恣其去留即日免遣者五六百

人及殤帝崩太后定策立安帝猶臨朝政

以連遭大憂百姓苦役

大憂謂和帝殤帝崩

殤帝康陵

方中祕藏

方中陵中也祕藏之中故言祕也

及諸工作事事減

約十分居一詔告司隸校尉河南尹南陽

太守曰每覽前代外戚賓客假借威權輕

薄認詞

言忽遽也認音七洞反調音洞

至有濁亂奉公爲人

患苦咎在執法怠懈不輒行其罰故也今

車騎將軍隲等雖懷敬順之志而宗門廣

大姻戚不少賓客姦猾多干禁憲

干犯也

其

明加檢勅勿相容護自是親屬犯罪無所

假貸太后愍陰氏之罪廢赦其徙者歸鄉

勅還資財五百餘萬永初元年爵號大夫

人爲新野君萬戶供湯沐邑

湯沐者取其賦稅以供湯沐之

具也二年夏京師旱親幸洛陽寺錄冤獄有

囚實不殺人而被考自誣羸困輿見畏吏

不敢言將去舉頭若欲自訴太后察視覺

之即呼還問狀具得枉實即時收洛陽令

下獄抵罪行未還宮澍雨大降三年秋太

后體不安左右憂惶禱請祝辭願得代命

太后聞之即譴怒切勅掖庭令以下但使

謝過祈福不得妄生不祥之言舊事歲終

當饗遣衛士

舊事衛士得代歸者上親饗焉前書蓋寬饒傳曰歲盡交代上臨饗罷衛

卒是也

大讎逐疫

禮記月令有大讎旁磔土牛以送寒氣鄭玄注云讎陰氣也此月之

中日歷虛危有墳墓四星之氣爲厲鬼隨彊陰出以害人故讎却之也

太后以陰陽

不和軍旅數興詔饗會勿設戲作樂減逐

疫偃子之半

偃子逐疫之人也音振薛綜注西京賦云偃之言善也善童幼子也續漢

書曰大難選中黃門子弟年十歲以上十二
以下百二十人爲振子皆赤幘皂製執大靴

悉罷

象橐駝之屬豐年復故太后自入宮掖從

曹大家受經書兼天文筭數晝省王政夜

則誦讀而患其謬誤懼乖典章乃博選諸

儒劉珍等及博士議郎四府掾史五十餘

人詣東觀讎校傳記

讎對也

事畢奏御賜葛

布各有差又詔中官近臣於東觀受讀經

傳以教授宮人左右習誦朝夕濟濟及新

野君薨太后自侍疾病至乎終盡憂哀毀

損事加於常贈以長公主赤綬東園祕器

玉衣繡衾

東園署名屬少府主作凶器故言祕也

又賜布三萬

匹錢三千萬隲等遂固讓錢布不受使司

空持節護喪事儀比東海恭王謚曰敬君

太后諒闇旣終

諒闇居喪之廬也或爲諒陰諒信也陰默也言居憂信默不言

久旱太后比三日幸洛陽錄囚徒理出死

罪三十六人耐罪八十人其餘減罪死右

趾已下至司寇七年正月初入太廟齋七

日賜公卿百僚各有差庚戌謁宗廟率命

婦羣妾相禮儀

相助也儀禮曰命夫者男子之爲大夫也命婦者大夫之妻也

與皇帝交獻親薦成禮而還

周禮宗廟祭之日旦王服衮冕

而入立於阼后服副褱從王而入王以圭瓚酌鬱鬯以獻尸次后以璋瓚酌鬱鬯以獻尸此謂交獻也卒

事凡九獻焉

因下詔曰凡供薦新味多非其節或

鬱養強孰或穿掘萌牙味無所至而夭折

生長豈所以順時育物乎傳曰非其時不

食

論語曰不時不食言非其時物則不食之前書邵信臣曰不時之物有傷於人不宜以奉供養

自

今當奉祠陵廟及給御者皆須時乃上凡

所省二十三種自太后臨朝水旱十載四

夷外侵盜賊內起每聞人飢或達旦不寐而躬自減徹以救災庀故天下復平歲還

豐稷元初五年平望侯劉毅

平望縣屬北海郡今青州北海

縣西北平望臺是也一名望海臺也

以太后多德政欲令早有

注記上書安帝曰臣聞易載義農而皇德

著

易繫辭曰古者庖羲氏之王天下仰觀法於天俯觀法於地於是始畫八卦以通神明之德以

類萬物之情庖羲氏沒神農氏作斲木爲耜揉木爲耒耒耜之利以教天下伏羲神農爲三皇故言皇德

也書述唐虞而帝道崇故雖聖明必書功

於竹帛流音於管弦

竹謂簡冊帛謂縑素黃帝以下六代樂皆所以章顯

功德是流
音於管弦

伏惟皇太后膺大聖之姿體乾坤

之德

易曰聖人與天地合其德

齊蹤虞妃比跡任姒

虞妃

即舜妻娥皇女英也任文王母如武王母也

孝悌慈仁允恭節約杜

絕奢盈之源防抑逸欲之兆正位內朝流

化四海

易家人卦曰女正位乎內正家而天下定矣禮記曰東夷西戎南蠻北狄謂之四海

及元興延平之際國無儲副仰觀乾象參

之人譽援立陛下爲天下主永安漢室綏

靜四海又遭水潦東州飢荒

延平元年安帝初即位六州大

水永初元年稟司隸充豫徐冀并六州貧人也

垂恩元元冠蓋交路

非薄衣食躬率羣下損膳解驂以贍黎苗

廣雅云苗衆也

惻隱之恩猶視赤子

隱痛也尚書曰若保赤子惟人

其康又也

克己引愆顯揚仄陋崇晏晏之政

尚書

考靈耀曰文基晏晏

敷在寬之教

敷布也尚書曰五教在寬

興滅國

繼絕世錄功臣復宗室追還徙人蠲除禁

錮政非惠和不圖於心制非舊典不訪於

朝弘德洋溢充塞宇宙

洋溢言多

洪澤豐沛漫

衍八方華夏樂化戎狄混并丕功著於大

漢碩惠加於生人巍巍之業可聞而不可

及蕩蕩之勲可誦而不可名古之帝王左

右置史

禮記玉藻曰動則左史書之言則右史書之

漢之舊典世

有注記夫道有夷崇治有進退若善政不

述細異輒書是爲堯湯負洪水大旱之責

而無咸熙假天之美

咸皆也熙廣也尚書曰庶績咸熙言堯之朝政

衆功皆廣假音格至也尚書曰祐我烈祖格于皇天言伊尹佐湯功至於天也堯洪水九載湯大旱七年

高宗成王有雉雉迅風之變而無中興康

寧之功也

高宗殷王也小乙之子名武丁當祭成湯有飛雉升鼎耳而雉高宗修德

殷道中興成王疑周公乃有雷電大風之變成王改過幾致刑措也

上考詩書有

虞二妃周室三母

尚書曰釐降二女于嬀汭嬀于虞三母謂后稷母姜

嫫王母大任武王母大姒也詩大雅曰厥初生人時維姜嫫又曰大任有身生此文王又曰太姒嗣徽

音則百斯男也

修行佐德

詩云既有烈考亦有文母是佐德

思不踰

閼

閼門限也左傳曰婦人送迎不出門見兄弟不踰閼

未有內遭家難

外遇災害覽總大麓經營天物

麓錄也言大錄萬機之政

書曰納於大麓又曰暴殄天物也

功德巍巍若茲者也宜令

史官著長樂宮注聖德頌以敷宣景耀勒

勲金石縣之日月

易曰縣象著明莫大於日月

攄之罔極

以崇陛下烝烝之孝帝從之

廣雅曰攄舒也孔安國注尚書

曰丞丞猶
進進也

六年太后詔徵和帝弟濟北河閒

王子男女年五歲以上四十餘人又鄧氏

近親子孫三十餘人並爲開邸第

蒼頡篇曰
邸舍也

教學經書躬自監試尚幼者使置師保朝

夕入宮撫循詔導恩愛甚渥

詔告也

乃詔從

兄河南尹豹越騎校尉康等曰吾所以引

納羣子置之學官者實以方今承百王之

敝時俗淺薄巧僞滋生五經衰缺不有化

導將遂陵遲故欲褒崇聖道以匡失俗傳

不云乎飽食終日無所用心難矣哉

論語孔子

言也言人終日飽食不措心於道義難矣哉言終無遠大也

今末世貴戚食

祿之家溫衣美飯乘堅驅良

堅謂好車良謂善馬也墨子曰

聖王爲衣服之法堅車良馬不知貴也

而面牆術學不識臧否

尚書

曰弗學牆面也

斯故禍敗所從來也永平中四姓

小侯皆令入學

小侯解見明紀

所以矯俗厲薄反

之忠孝先公旣以武功書之竹帛兼以文

德教化子孫

先公謂鄧禹禹有子十三人各使守一藝故曰文德也

故能束

脩不觸羅網

言能自約束修整也

誠令兒曹上述祖考

休烈下念詔書本意則足矣其勉之哉康
以太后久臨朝政心懷畏懼託病不朝太
后使內人問之時宮婢出入多能有所毀
譽其耆宿者皆稱中大人所使者乃康家
先婢亦自通中大人康聞詬之曰汝我家
出爾敢爾邪婢怒還說康詐疾而言不遜
太后遂免康官遣歸國絕屬籍永寧二年
二月寢病漸篤乃乘輦於前殿見侍中尚
書因北至太子新所繕宮還大赦天下賜

諸園貴人王主羣僚錢布各有差詔曰朕以無德託母天下而薄祐不天早離大憂延平之際海內無主元元危運危於累卵

說苑曰晉靈公驕奢造九層之臺國困人貧恥功不成令曰左右諫者斬也荀息乃求見公曰諫邪荀息曰不敢臣能累十二博棊加九雞子其上公曰危哉荀息曰復有危於此者公爲九層之臺男女不得耕織社稷一滅君何所望君曰寡人之過乃壞臺焉勤勤苦心不敢以萬乘

爲樂上欲不欺天愧先帝下不違人負宿心誠在濟度百姓以安劉氏自謂感徹天地當蒙福祚而喪禍內外傷痛不絕

內外謂新野君

薨及和殤二帝崩也

頃以廢病沈滯久不得侍祠自力

上原陵加欬逆唾血遂至不解存亡大分

無可柰何公卿百官其勉盡忠恪以輔朝

廷三月崩在位二十年年四十一合葬順

陵

論曰鄧后稱制終身號令自出術謝前政

之良身闕明辟之義

前政謂周公也辟君也尚書曰朕復子明辟言周公

攝位復還成王今太后不還故曰闕也

至使嗣主側目歛衽於虛

器

器謂神器諭帝位也

直生懷蕙懸書於象魏

象魏闕也

直生杜根等上書請太后還政

借之儀者殆其惑哉

借猶假也殆近也言

太后不還政於安帝近可惑也

然而建光之後王柄有歸

太后

建光之中崩歸政安帝

遂乃名賢戮辱便孽黨進

帝寵用乳

母王聖及其女伯榮出入官掖通傳姦賂太尉楊震及鄧騭等皆被中官譖誅也

衰戮之

來茲焉有徵

戮敗也安帝臨政衰敗逾甚故曰有徵也

故知持權

引謗所幸者非已焦心卹患自強者唯國

言執持朝權以招衆謗者所幸不爲己身唯憂國也

是以班母一說闔門

辭事

太后兄大將軍騭以母憂上書乞身太后不許以問班昭乃許之語見昭傳也

愛

姪微愆髡剔謝罪

太后兄騭子鳳受遺事洩騭遂髡妻及鳳以謝天下語見

後漢紀十一
傳將杜根逢誅未值其誠乎

誠信也言未但

蹊田之牛奪之已甚

左傳申叔時曰牽牛以蹊人之田而奪之牛牽牛以

蹊者信有罪矣而奪之牛罰已重矣此喻杜根上書雖曰有罪太后殺之爲過甚也

後漢皇后紀卷第十上

皇后紀第十下

范曄

後漢書十

唐章懷太子賢注

安思閭皇后

順烈梁皇后

孝崇愍皇后

桓帝懿獻梁皇后

孝柏鄧皇后

桓思竇皇后

孝仁董皇后

孝靈宋皇后

靈思何皇后

獻帝伏皇后

獻穆曹皇后

安思閭皇后諱姬

謚法曰謀慮不愆曰思

河南滎陽人

也祖父章永平中爲尚書以二妹爲貴人

章精力曉舊典父次當遷以重職顯宗爲

後宮親屬竟不用出爲步兵校尉

漢官儀曰比二

千石掌宿衛兵屬北軍中候也

章生暢暢生后后有才色元

初元年以選入掖庭甚見寵愛爲貴人二

年立爲皇后后專房妒忌帝幸宮人李氏

生皇子保遂鳩殺李氏

鳩毒鳥也食蝮以其羽畫酒中飲之立死

年以后父侍中暢爲長水校尉封北宜春

侯

北宜春縣屬汝南郡以豫章有宜春故此加北故城在今豫州汝陽縣西南也

食邑五

千戶四年暢卒謚曰文侯子顯嗣建光元

年鄧太后崩帝始親政事顯及弟景耀晏

並爲卿校典禁兵延光元年更封顯長杜

縣侯

長杜縣屬潁川郡前書音義曰其杜中樹暴長故名長杜今許州縣

食邑萬

三千五百戶追尊后母宗爲滎陽君

續漢志曰

婦人封君儀比公主油犍駟車帶綬以采組爲緹帶各如其綬色黃金辟邪加其首爲帶

顯景

諸子年皆童齒

大戴禮曰男八歲而齒女七歲而齒齒毀齒也音初刃反並

爲黃門侍郎后寵旣盛而兄弟頗與朝權

后遂與大長秋江京中常侍樊豐等共譖

皇太子保廢爲濟陰王四年春后從帝幸

章陵帝道疾崩於葉縣后顯兄弟及江京

樊豐等謀曰今晏駕道次

晏晚也臣下不敢斥言帝崩猶言晚

駕而出濟陰王在內邂逅公卿立之還爲大

害乃僞云帝疾甚徙御卧車行四日驅馳

還宮明日詐遣司徒劉喜詣郊廟杜稷告

天請命其夕乃發喪尊后曰皇太后皇太

后臨朝

蔡邕獨斷曰少帝即位太后即代攝政臨前殿朝羣臣太后東面少帝西面羣臣奏

事上書皆爲兩通以顯爲車騎將軍儀同三

一詣后一詣少帝

司太后欲久專國政貪立幼年與顯等定

策禁中迎濟北惠王子北鄉侯懿

惠王名壽章帝子也

立爲皇帝顯忌大將軍耿寶

耿弇之弟舒之孫

位

尊權重威行前朝乃風有司奏寶及其黨

與中常侍樊豐虎賁中郎將謝暉暉弟侍

中篤篤弟大將軍長史宓

善文曰暉字伯周宓字仲周篤字季周

侍中周廣阿母野王君王聖聖女永永壻

黃門侍郎樊嚴等更相阿黨互作威福探

刺禁省更爲唱和皆大不道豐暉廣皆下

獄死家屬徙比景

比景縣名屬日南郡前書音義曰日中於頭上景在己下

故名

宓嚴減死髡鉗貶寶爲則亭侯遣就

國自殺王聖母子徙鴈門於是景爲衛尉
耀城門校尉晏執金吾兄弟權要威福自
由少帝立二百餘日而疾篤顯兄弟及江
京等皆在左右京引顯屏語曰北鄉侯病
不解國嗣宜時有定前不用濟陰王今若
立之後必當怨人何不早徵諸王子簡所
置乎顯以爲然及少帝薨京白太后徵濟

北河間王子未至而中黃門孫程合謀殺
江京等立濟陰王是爲順帝顯景晏及黨
與皆伏誅遷太后於離宮家屬徙比景明
年太后崩在位十二年合葬恭陵帝母李
氏瘞在洛陽城北帝初不知莫敢以聞及
太后崩左右白之帝感悟發哀親到瘞所
更以禮殯上尊謚曰恭愍皇后葬恭北陵
爲策書金匱藏于世祖廟

在恭陵之北因以
爲名漢官儀曰置

陵園令食監各一人秩皆
六百石金匱緘之以金

順烈梁皇后諱嬀

謚法曰執德尊業曰烈聲類曰嬀嬀娶也音納

大將

軍商之女恭懷皇后弟之孫也后生有光

景之祥少善女工好史書九歲能誦論語

治韓詩

韓嬰所傳詩也

大義略舉常以列女圖畫

置於左右以自監戒

劉向撰列女傳八篇圖畫其象

父商深

異之竊謂諸弟曰我先人全濟河西所活

者不可勝數

商曾祖統更始二年補中郎將酒泉太守使安集涼州時西河擾亂

衆議以統素有威信乃推統與竇融共完全五郡

雖大位不究而積德

必報若慶流子孫者儻興此女乎永建三

年與姑俱選入掖庭時年十三相工茅通
見后驚再拜賀曰此所謂日角偃月相之
極貴臣所未嘗見也太史卜兆得壽房又
筮得坤之比易坤卦六五爻變而之比比九五象曰顯比之吉位正中也九五居得其
位下應於上故吉遂以爲貴人常特被引御從容辭

於帝曰夫陽以博施爲德陰以不專爲義

螽斯則百福之所由興也

詩國風序曰言后妃若螽斯不妬忌則子

孫衆多也詩大雅曰太姒嗣徽音則百斯男也

願陛下思雲雨之均澤

識貫魚之次序

易曰雲行雨施品物流形剥卦曰貫魚以宮人寵無不利剥坤

下艮上五陰而一陽衆陰在下駢頭相次似貫魚也

使小妾得免罪謗之

累由是帝加敬焉陽嘉元年春有司奏立

長秋宮以乘氏侯商先帝外戚

商祖姑章帝貴人生和帝

也春秋之義娶先大國

公羊傳曰天子娶於紀紀本子爵也先褒爲侯

言王者不娶於小國也

梁小貴人宜配天祚正位坤極

正其內位居陰德之極也易曰女正位乎內也

帝從之乃於壽安殿立

貴人爲皇后

壽安是德陽宮內殿名

后旣少聰惠深

覽前世得失雖以德進不敢有驕專之心

每日月見謫

謫責也禮記云陽事不得謫見於天日爲之食陰事不得謫見於天

月爲輒降服求愆建康元年帝崩后無子之食

美人虞氏子炳立是爲沖帝尊后爲皇太后太后臨朝沖帝尋崩復立質帝猶秉朝

政時楊徐劇賊寇擾州郡西羌鮮卑及日

南蠻夷攻城暴掠賦斂煩數官民困竭太

后夙夜勤勞推心杖賢委任太尉李固等

拔用忠良務崇節儉其貪叨罪慝多見誅

廢貪財曰叨慝惡也分兵討伐羣寇消夷故海內肅

然宗廟以寧而兄大將軍翼鳩殺質帝專

權暴濫已害忠良數以邪說疑誤太后遂
立栢帝而誅李固太后又溺於宦官多所
封寵以此天下失望和平元年春歸政於
帝太后寢疾遂篤乃御輦幸宣德殿見宮
省官屬及諸梁兄弟詔曰朕素有心下結
氣從間以來加以浮腫逆害飲食寤已沈
困也寤漸也比使內外勞心請禱私自忖度曰
夜虛劣不能復與羣公卿士共相終竟援
立聖嗣恨不久育養見其終始今以皇帝

將軍兄弟委付股肱其各自勉焉後二日而崩在位十九年年四十五合葬憲陵虞美人者以良家子年十三選入掖庭

續漢志曰美人

父詩爲郎中詩父衡屯騎校尉

又生女舞陽長公主自漢興

母氏莫不尊寵順帝旣未加美人爵號而冲帝早夭大將軍梁冀秉政忌惡佗族故虞氏抑而不登但稱大家而已陳夫人者家本魏郡少以聲伎入孝王宮得幸生質帝亦以梁氏故榮寵不及焉熹平四年小

黃門趙祐

續漢志曰小黃門六百石宦者無負掌侍左右受尚書事上在內宮關通中外

及中宮以下衆事諸公主及王大妃等疾苦則使問之

議郎卑整上言

風俗

通曰卑氏鄭大夫卑諶之後漢有卑躬爲北平太守

春秋之義母以子貴

公羊傳曰桓公幼而貴隱公長而卑桓何以貴母貴也母貴則子何以貴子以母貴母以子貴隆

漢盛典尊崇母氏凡在外戚莫不加寵今

沖帝母虞大家質帝母陳夫人皆誕生聖

皇而未有稱號夫臣子雖賤尚有追贈之

典況二母見在不蒙崇顯之次無以述遵

先世垂示後世也帝感其言乃拜虞大家

爲憲陵貴人陳夫人爲渤海孝王妃

孝王名鴻章帝

子千乘貞王伉之孫鴻生質帝帝立徙勃海焉

使中常侍持節授印綬

遣太常以三牲告憲陵懷陵靜陵焉

懷陵沖帝陵靜

陵質帝陵

孝崇園皇后諱明

園音偃

爲蠡吾侯翼媵妾

蠡吾侯翼河間王開子和帝孫

生桓帝桓帝即位明年追尊

翼爲孝崇皇陵曰博陵以后爲博園貴人

和平元年梁太后崩乃就博陵尊后爲孝

崇皇后遣司徒持節奉策授璽綬齋乘輿

器服備法物宮曰永樂置太僕少府以下

皆如長樂宮故事

漢官儀曰帝祖母稱長信宮帝母稱長樂宮故有長信少

府長樂少府及職吏皆宦者爲之

又置虎賁羽林衛士起宮

室分鉅鹿九縣爲后湯沐邑在位三年元

嘉二年崩以帝弟平原王石爲喪主

石彘翼子

桓帝

斂以東園畫梓壽器玉匣飯舍之具

禮儀制度比恭懷皇后

東園署名屬少府掌爲棺器梓木爲棺以漆畫

之稱壽器者欲其久長也猶如壽堂壽宮壽陵之類也漢舊儀曰梓棺長二丈崇廣四尺玉匣者甬已而

爲匣至足亦縫以黃金爲縷飯舍者以珠玉實口

使司徒持節大長秋

奉弔祠賻錢四千萬

公羊傳曰貨財曰賻

布四萬匹中

謁者僕射典護喪事侍御史護大駕鹵簿

漢官儀曰天子車駕次第謂之鹵簿有大駕法駕小駕大駕公卿奉引大將軍參乘大僕御屬車八十一乘備千乘萬騎侍御史在左駕馬詢問不法者今儀比車駕故以侍御史監護焉 詔安平

主豹河間王建勃海王惺

惺音恢

長社益陽

二長公主

長社公主桓帝姊耿弇弟霸玄孫援尚焉益陽公主桓帝妹侍中寇榮從兄子

尚焉與諸國侯三百里內者及中二千石二

千石令長相皆會葬將作大匠復土繕廟

合葬博陵

桓帝懿獻梁皇后諱女瑩

諡法曰溫和聖善曰懿聰明叡知曰獻

順烈皇后之女弟也帝初爲蠡吾侯梁太

后徵欲與后爲婚未及嘉禮

嘉禮婚禮

會質帝

崩因以立帝明年有司奏太后曰春秋迎

王后于紀在塗則稱后

公羊傳曰祭公來逆王后于紀傳曰祭公者何

天子之三公其稱王后何王者無外其辭成矣

今大將軍異女弟膺紹

聖善

膺當也紹嗣也聖善謂母也言娶妻當嗣親也詩云母氏聖善

結婚之際

有命旣集

謂太后先有令許結親也詩云天監在下有命旣集也

宜備

禮章時進徵幣

徵成也納幣以成婚

請下三公太常

案禮儀奏可於是采依孝惠皇帝納后故

事聘黃金二萬斤納采鴈璧乘馬束帛一

如舊典

漢書舊儀聘皇后黃金萬斤呂后爲惠帝娶魯元公主女故特優其禮也儀禮曰納

采用鴈鄭玄注曰納其采擇之禮用鴈取順陰陽往來也周禮王者穀圭以聘女鄭玄注云士大夫已上乃以玄纁束帛天子加以穀圭諸侯加以大璋然禮稱以圭此云用璧形制雖異爲玉同也乘馬四匹馬也雜記曰納幣一束束五兩兩五尋然則每端二丈也建和元年六月始

入掖庭八月立爲皇后時太后秉政而梁冀專朝故后獨得寵幸自下莫得進見后藉姊兄蔭勢恣極奢靡宮幄彫麗服御珍

華巧飾制度兼倍前世及皇太后崩恩愛
稍衰后既無子潛懷怨忌每宮人孕育鮮
得全者帝雖迫畏梁冀不敢譴怒然見御
轉稀至延熹三年后以憂恚崩在位十三
年葬懿陵其歲誅梁冀廢懿陵爲貴人冢
焉

桓帝鄧皇后諱猛女和熹皇后從兄子鄧
香之女也母宣初適香生后改嫁梁紀紀
者大將軍梁冀妻孫壽之舅也后少孤隨

母爲居因冒姓梁氏冀妻見后貌美永興

中進入掖庭爲采女絕幸

采擇也以因采擇而立名

明年

封兄鄧演爲南頓侯位特進演卒子康嗣

及懿獻后崩梁冀誅立后爲皇后帝惡梁

氏改姓爲薄封后母宣爲長安君四年有

司奏后本郎中鄧香之女不宜改易它姓

於是復爲鄧氏追封贈香車騎將軍安陽

侯印綬更封宣康大縣宣爲昆陽君康爲

沘陽侯賞賜巨萬計

巨大也大萬謂萬萬也

宣卒贈贈

葬禮皆依后母舊儀以康弟統襲封昆陽侯位侍中統從兄會襲安陽侯爲虎賁中郎將又封統弟秉爲涑陽侯宗族皆列校郎將帝多內幸博採宮女至五六千人及駟役從使復兼倍於此而后恃尊驕忌與帝所幸郭貴人更相譖訐八年詔廢后送

暴室以憂死

漢官儀曰暴室在掖庭內丞一人主宮中婦人疾病者其皇后貴人有罪

亦就此室也

立七年葬於北邙從父河南尹萬世

及會皆下獄死統等亦繫暴室免官爵歸

本郡財物没入縣官

相思竇皇后諱妙章德皇后從祖弟之孫女也父諱武延熹八年鄧皇后廢后以選入掖庭爲貴人其冬立爲皇后而御見甚稀帝所寵唯采女田聖等永康元年冬帝寢疾遂以聖等九女皆爲貴人及崩無嗣后爲皇太后太后臨朝定策立解犢亭侯宏是爲靈帝太后素忌忍積怒田聖等相帝梓宮尚在前殿遂殺田聖又欲盡誅諸

貴人中常侍管霸蘇康苦諫乃止時太后
父大將軍武謀誅宦官而中常侍曹節等
矯詔殺武遷太后於南宮雲臺家屬徙比
景竇氏雖誅帝猶以太后有援立之功建
寧四年十月朔率羣臣朝于南宮親饋上
壽黃門令董萌漢官儀曰黃門令秩六百石因此數爲太后訴
怨帝深納之供養資奉有加於前中常侍
曹節王甫疾萌附助太后誣以謗訕永樂
宮靈帝母所居也訕謗毀也萌坐下獄死熹平元年太后母

卒於比景后感疾而崩立七年合葬宣陵

孝仁董皇后諱某河閒人爲解犢亭侯萇

夫人

萇河閒孝王開孫淑之子也

生靈帝建寧元年帝即

位追尊萇爲孝仁皇陵曰愼陵以后爲愼

園貴人及竇氏誅明年帝使中常侍迎貴

人并徵貴人兄寵到京師上尊號曰孝仁

皇后居南宮嘉德殿

嘉德殿在九龍門內

宮稱永樂

拜寵執金吾後坐矯稱永樂后屬請下獄

死及竇太后崩始與朝政使帝賣官求貨

自納金錢盈滿堂室中平五年以后兄子

衛尉脩侯重

脩今德州縣也故城在縣南脩今作脩音脩

爲票騎將

軍領兵千餘人初后自養皇子協數勸帝

立爲太子而何皇后恨之議未及定而帝

崩何太后臨朝重與太后兄大將軍進權

勢相害后每欲參干政事太后輒相禁塞

后忿恚詈言曰汝今轉張怙汝兄耶

轉張猶疆梁也

當勅票騎斷何進頭來何太后聞以告進

進與三公及弟車騎將軍苗等奏孝仁皇

后使故中常侍夏惲永樂太僕封譖等交

通州郡

漢官儀曰永樂太僕用中人爲之

辜較在所珍寶貨

賂悉入西省

辜較解見靈紀西省即謂永樂宮之司

蕃后故事

不得留京師

蕃后謂平帝母衛姬時王莽攝政恐其專權后不得留在京師故云故事

也輿服有章膳羞有品請永樂后遷宮本

國奏可何進遂舉兵圍驃騎府收重免官

自殺后憂怖疾病暴崩在位二十二年民

間歸咎何氏喪還河間合葬愼陵

靈帝宋皇后諱某扶風平陵人也肅宗宋

貴人之從曾孫也建寧三年選入掖庭爲

貴人明年立爲皇后父豐執金吾封不其

鄉侯

不其縣屬琅邪郡故城在今萊州即墨縣西南蓋其縣之鄉也其音基決錄注豐字伯遇

后無寵而居正位後宮幸姬衆共譖毀初

中常侍王甫枉誅勃海王惲及妃宋氏

熹平

元年王甫譖惲與中常侍鄭颯交通欲迎立惲惲自殺妃死獄中也

妃即后之姑

也甫恐后怨之乃與大中大夫程璜共構

言皇右挾左道祝詛

禮記曰執左道以亂衆殺無赦鄭玄注云左道若巫

也帝信之光和元年遂策收璽綬后自致

暴室以憂死在位八年父及兄弟並被誅
諸常侍小黃門在省闈者皆憐宋氏無辜
共合錢物收葬廢后及鄧父子歸宋氏舊
瑩臯門亭

詩云迺立臯門注云王之郭門曰
臯門漢官儀曰十二門皆有亭

帝

後夢見栢帝怒曰宋皇后有何罪過而聽
用邪孽使絕其命勃海王惺旣已自貶又
受誅斃今宋氏及惺自訴於天上帝震怒

上帝天也震動也
書曰帝乃震怒也

罪在難救夢殊明察帝旣

覺而恐以事問於羽林左監許永

續漢志曰
羽林左監

一人秩六百石主羽林左

騎右亦如之永或作詠

攘謂除也

永對曰宋皇后親與陛下共承宗廟

母臨萬國歷年已久海內蒙化過惡無聞

而虛聽讒妬之說以致無辜之罪身嬰極

誅禍及家族天下臣妾咸爲怨痛勃海王

惺相帝母弟也處國奉藩未嘗有過陛下

曾不證審遂伏其辜昔晉侯失刑亦夢大

厲被髮屬地

左傳曰晉侯夢大厲被髮及地搏

帝矣杜預注曰厲鬼趙氏之先祖也晉侯先殺趙同趙括故怒也

天道明察鬼神

難誣宜並改葬以安冤魂反宋后之徙家
復勃海之先封以消厥咎帝弗能用尋亦
崩焉

靈思何皇后諱某南陽宛人家本屠者以
選入掖庭

風俗通曰漢以八月筭人后家以金帛賂遺主者以求入也

長七

尺一寸生皇子辯養於史道人家號曰史

侯

道人謂道術之人也獻帝春秋曰靈帝數失子不敢正名養道人史子眇家號曰史侯

拜

后爲貴人甚有寵幸性彊忌後宮莫不震
懾光和三年立爲皇后明年追號后父真

爲車騎將軍舞陽宣德侯因封后母興爲

舞陽君時王美人任娠

左傳曰邑姜方娠杜預注曰懷胎爲娠音之刃

反一音身

畏后乃服藥欲除之而胎安不動又

數夢負日而行四年生皇子協后遂酖殺

美人帝大怒欲廢后諸宦官固請得止董

太后自養協號曰董侯王美人趙國人也

祖父苞五官中郎將美人豐姿色聰敏有

才明能書會計

會計謂摠會其數而筭

以良家子應法

相選入掖庭帝愍協早失母又思美人作

追德賦令儀頌中平六年帝崩皇子辯即位尊后爲皇太后太后臨朝后兄大將軍進欲誅宦官反爲所害舞陽君亦爲亂兵所殺并州牧董卓被徵將兵入洛陽陵虐朝廷遂廢少帝爲弘農王而立協是爲獻帝扶弘農王下殿北面稱臣太后鯁涕羣臣含悲莫敢言董卓又議太后踰迫永樂宮至今憂死逆婦姑之禮乃遷於永安宮因進醢弑而崩在位十年董卓令帝出奉

常享舉哀

華延雋洛陽記曰城內有奉常亭

公卿皆白衣會

不成喪也

有凶事素服而朝謂之白衣會左傳曰不書葬不成喪

合葬文

昭陵初太后新立當謁二祖廟欲齋輒有

變故如此者數竟不克時有識之士心獨

怪之後遂因何氏傾沒漢祚焉明年山東

義兵大起討董卓之亂卓乃置弘農王於

閣上使郎中令李儒進酖曰服此藥可以

辟惡王曰我無疾是欲殺我耳不肯飲強

飲之不得已乃與妻唐姬及宮人飲讌別

酒行王悲歌曰天道易兮我何艱棄萬乘
兮退守蕃逆臣見迫兮命不延逝將去汝
兮適幽玄因令唐姬起舞姬抗袖而歌抗舉
也曰皇天崩兮后土積史記周烈王崩周人謂齊威王曰天崩地坼也

身爲帝兮命夭摧死生路異兮從此乖柰
我煢獨兮心中哀因泣下嗚咽坐者皆歔
歔王謂姬曰卿王者妃執不復爲吏民妻
自愛從此長辭遂飲藥而死時年十八唐
姬潁川人也王薨歸鄉里父會稽太守瑁

欲嫁之姬誓不許及李傕破長安遣兵鈔

關東略得姬傕因欲妻之固不聽而終不

自名

不自名少帝之姬也表宏紀曰爲傕所略不敢自言

尚書賈詡知之

魏志曰詡字文和武威姑臧人少時漢陽閭忠見而異之曰詡有良平之才

以狀白獻

帝帝聞感愴乃下詔迎姬置園中使侍中

持節拜爲弘農王妃初平元年二月葬弘

農王於故中常侍趙忠成壙中

趙忠先有成壙因而葬焉

謚曰懷王帝求母王美人兄斌斌將妻子

詣長安賜第宅田業拜奉車都尉興平元

年帝加元服有司奏立長秋官詔曰朕稟
受不弘遭值禍亂未能紹先以光故典皇
母前薨未卜宅兆禮章有闕中心如結

詩云

心如結兮

三歲之感蓋不言吉且須其後於是

有司乃奏追尊王美人爲靈懷皇后改葬

文昭陵儀比敬恭二陵

敬章帝陵
恭安帝陵

使光祿

大夫持節行司空事奉璽綬斌與河南尹

駱業復土斌還遷執金吾封都亭侯

凡言
都亭

者並城內亭也漢法大縣侯位視三公小
縣侯位視上卿鄉侯亭侯視中二千石也

食邑五

百戶病卒贈前將軍印綬謁者監護喪事

長子端襲爵

獻帝伏皇后諱壽琅邪東武人

東武今密州諸城縣

大

司徒湛之八世孫也父完沈深有大度襲

爵不其侯尚桓帝女陽安公主

陽安縣屬汝南郡故城在

今豫州朗山縣東北

爲侍中初平元年從大駕西遷長

安后時入掖庭爲貴人興平二年立爲皇

后完遷執金吾帝尋而東歸李傕郭汜等

追敗乘輿於曹陽帝乃潛夜度河走

度所在今陝州

陝縣北水經曰銅翁仲所禮六宮皆步行出營

沒處是獻帝東遷潛度所禮曰王后率六宮之人鄭玄注曰六宮之人夫人以下分居后之六宮者后手持縑數

匹董承使符節令孫徽以刃脅奪之殺傍

侍者血濺后衣濺音子見反既至安邑御服穿敝

唯以棗栗爲糧建安元年拜完輔國將軍

儀比三司完以政在曹操自嫌尊戚乃上

印綬拜中散大夫尋遷屯騎校尉十四年

卒子典嗣自帝都許守位而已宿衛兵侍

莫非曹氏黨舊姻戚議郎趙彥嘗爲帝陳

後漢記十下

言時策曹操惡而殺之其餘內外多見誅
戮操後以事入見殿中帝不任其憤因曰
君若能相輔則厚不爾幸垂恩相捨操失
色俛仰求出舊儀三公領兵朝見令虎賁
執刃挾之操出顧左右汗流浹背

浹徹也音
子協反

自後不敢復朝請董承女爲貴人操誅承

而求貴人殺之帝以貴人有隻

說文曰隻孕
也音仁蔭反

累爲請不能得后自是懷懼乃與父完書
言曹操殘逼之狀令密圖之完不敢發至

十九年事乃露泄操追大怒遂逼帝廢后

假爲策曰皇后壽得由卑賤登顯尊極自

處椒房

漢官儀曰皇后稱椒房取其蕃實之義也詩云椒聊之實蕃衍盈并

二紀

于茲旣無任姒徽音之美

大任文王母大姒武王母徽美也詩

云大姒嗣徽音

又乏謹身養己之福

左傳曰人受天地之中而生謂之命

能者養之以福不能者敗以取禍

而陰懷妒害苞藏禍心弗可

以承天命奉祖宗今使御史大夫郝慮持

節策詔其上皇后璽綬

蔡邕獨斷曰皇后赤綬玉璽續漢志曰乘輿黃

赤綬四綵黃赤縹紺淳黃圭綬長二丈九尺九寸五百首太皇太后皇太后其綬皆與乘輿同

退

避中宮遷于它館嗚呼傷哉自壽取之未

致于理爲幸多焉又以尚書令華歆爲郗

慮副

魏志曰華歆字子魚平原高唐人代荀或爲尚書令慮字鴻預山陽高平人

勒兵

入宮收后閉戶藏壁中歆就牽后出時帝

在外殿引慮於坐后被髮徒跣行泣過訣

曰不能復相活邪帝曰我亦不知命在何

時顧謂慮曰郗公天下寧有是邪遂將后

下暴室以幽崩所生二皇子皆酖殺之后

在位二十年兄弟及宗族死者百餘人母

盈等十九人徙涿郡

獻穆曹皇后諱節

謚法曰布德執義曰穆

魏公曹操

之中女也建安十八年操進三女憲節華

爲夫人聘以束帛玄纁五萬匹小者待年

於國

留住於國以待年長

十九年並拜爲貴人及伏

皇后被弑明年立節爲皇后魏受禪遣使

求璽綬后怒不與如此數輩后乃呼使者

入親數讓之以璽抵軒下

抵擲也軒闌板也

因涕泣

橫流曰天不祚爾左右皆莫能仰視后在

位七年魏氏既立以后爲山陽公夫人自
後四十一年魏景初元年薨合葬禪陵車
服禮儀皆依漢制

論曰漢世皇后無謚皆因帝謚以爲稱雖

呂氏專政上官臨制亦無殊號

上官昭
帝后也

中興

明帝始建光烈之稱其後並以德爲配至
於賢愚優劣混同一貫故馬竇二后俱稱
德焉其餘唯帝之庶母及蕃王承統以追
尊之重特爲其號如恭懷孝崇之比是也

初平中蔡邕始追正和熹之謚

蔡邕集謚議曰漢世母氏

無謚至于明帝始建光烈之稱是後轉因帝號加之以德上下優劣混而爲一違禮大行受大名小行受小名之制謚法有功安人曰熹帝后一體禮亦宜同大行皇太后謚宜爲和熹其安思順烈以下皆依而加焉

贊曰坤惟厚載陰正乎內

易曰坤厚載物又曰女正位乎內男正位

乎外

詩美好逌

逌匹也詩云窈窕淑女君子好逌言后妃有關雎之德爲君子好匹

易稱歸妹

兌下震上歸妹卦也婦人謂嫁曰歸妹爲少女之稱兌爲少陰震爲長陽少陰

而承長陽悅以動之嫁妹之象也以六五與九二相應五爲王侯故易言帝乙歸妹

祁祁皇

嬬言觀貞淑

祁祁衆多也嬬亦麗也觀示也言諸后皆示其貞淑配皇爲麗案字

書無嬈字相傳音麗蕭該音離

媚茲良哲承我天祿班政蘭

閨宣禮椒屋

班固西都賦曰後宮則掖庭椒房后妃之室蘭林蕙草披香發越蘭

林殿名故言蘭閨椒屋即椒房也

既云德升亦曰幸進

德升謂馬鄧等也幸

進謂閭何之類也

身當隆極族漸河潤

公羊傳曰河潤海潤千里也視

景爭暉方山並峻乘剛多阻行地必順

易屯

卦象曰六二之難乘剛也又坤卦曰牝馬地類行地無疆王弼注云地之所以得無疆者以卑順行之故

也咎集驕滿福協貞信慶延自己禍成誰

釁

漢制皇女皆封縣公主儀服同列侯

漢法大縣侯視

三其尊崇者加號長公主儀服同蕃王蔡邕

曰帝女曰公主姊妹曰長公主建武十五年封武陽公主爲長公主即是帝女尊崇亦爲長非惟姊妹也

輿服志曰長公主赤罽
駟車與諸侯同綬也諸王女皆封鄉亭公主

儀服同鄉亭侯鄉亭侯視中二千石肅宗唯特封東

平憲王蒼琅邪孝王京女爲縣公主東平王傳曰封

蒼女五人爲縣公主
孝王女傳不見其數其後安帝桓帝妹亦封

長公主同之皇女案鄧禹玄孫少府褒尚舞陰
長公主耿弇曾孫侍中良尚

漢陽長公主岑彭玄孫魏郡守熙尚涅陽長公主來
歆玄孫虎賁中郎將定尚平氏長公主並安帝妹也

長社益陽公主桓
帝妹也解見上其皇女封公主者所生之

子襲母封爲列侯

馮定獲嘉公主子襲封獲嘉侯馮奮平陽公主子襲封平

陽侯此其類也

皆傳國於後鄉亭之封則不傳襲

其職僚品秩事在百官志

沈約謝儼傳曰范曄所撰十志一皆託儼

搜撰垂畢遇曄敗悉蠟以覆車宋文帝令丹陽尹徐湛之就儼尋求已不復得一代以爲恨其志今闕續

漢志曰諸公主家令一人六百石丞一人三百石其餘屬吏增減無常漢官儀曰長公主傳一人私府長

一人食官一人永巷長一人家令一人秩皆六百石各有負吏而鄉公主傳一人秩六百石僕一人六百

石家丞一人三百石也

不足別載故附于后紀末

皇女義王建武十五年封舞陽長公主適

延陵鄉侯大僕梁松

舞陽縣屬潁川郡松梁統之子其傳云尚光武女舞

陰公主又鄧訓傳舞陰公主子梁
扈有罪訓與交通此云舞陽誤也
松坐誹謗誅

皇女中禮十五年封涅陽公主適顯親侯

大鴻臚竇固

涅陽屬南陽郡顯親縣屬漢陽郡固竇融子

肅宗尊

爲長公主

皇女紅夫十五年封館陶公主適駙馬都

尉韓光光坐與淮陽王延謀反誅

皇女禮劉十七年封涑陽公主適陽安侯

長樂少府郭璜

璜郭況子也

璜坐與竇憲謀反誅

皇女綬

綬一作綬

二十一年封酈邑公主適新陽

侯卅子陰豐豐害主誅死

酈縣屬南陽郡音擲亦反新陽縣屬

汝南郡豐陰就子

卅祖五女

皇女姬永平二年封獲嘉長公主適楊邑

侯將作大匠馮柱

獲嘉縣屬河內郡楊邑縣屬太原郡柱馬魴子

皇女奴三年封平陽公主

平陽縣屬河東郡

適大鴻臚

馮順

馮勤子也

皇女迎

迎或作延

三年封隆慮公主

隆慮縣屬河內郡

適

牟平侯耿襲

牟平縣屬東萊郡襲耿弇弟舒之子

皇女次二年封平氏公主

平氏縣屬南陽縣
既不言所適不顯

始終蓋史闕之
也它皆倣此

皇女致三年封沁水公主

沁水縣屬
河內郡

適高

密侯鄧乾

乾鄧震之子
禹之孫

皇女小姬十二年封平臯公主

平臯縣屬
河內郡

適昌安侯侍中鄧蕃

昌安縣屬高密國蕃
鄧襲子禹之孫也

皇女仲十七年封浚儀公主適軼侯

軼志
作軼

音伏師右曰
又音徒系反黃門侍郎王度

軼縣屬江夏郡度
王符子霸之孫

皇女惠十七年封武安公主適征羌侯世

子黃門侍郎來校

征羌縣屬汝南郡校寢之子歆之孫

安帝尊

爲長公主

皇女臣建初元年封魯陽公主

魯陽縣屬南陽郡

皇女小迎元年封樂平公主

樂平太清縣屬東郡章帝更名

皇女小民元年封成安公主

成安縣屬潁川郡

顯宗十一女

皇女男建初四年封武德長公主

皇女王四年封平邑公主

平邑縣屬代郡今魏郡昌樂東

北又有平邑城適黃門侍郎馮由

皇女吉永元五年封陰安公主

陰安縣屬魏郡

肅宗三女

皇女保延平元年封脩武長公主

脩武縣屬河內郡

皇女成元年封共邑公主

共縣屬河內郡

皇女利元年封臨潁公主

縣屬潁川郡

適即墨侯

侍中賈建

即墨縣屬膠東國建賈參子復之曾孫

皇女興元年封聞喜公主

聞喜縣屬河東郡

和帝四女

皇女生永和三年封舞陽長公主

皇女成男三年封冠軍長公主

冠軍縣屬南陽郡

皇女廣永和六年封汝陽長公主

汝陽縣屬汝南郡

順帝三女

皇女華延熹元年封陽安長公主適不其

侯輔國將軍伏完

完伏湛五世孫

皇女堅七年封潁陰長公主

潁陰縣屬潁川郡

皇女脩九年封陽翟長公主

桓帝三女

皇女某光和三年封萬年公主

靈帝一女

後漢皇后紀卷第十下